



Federal Republic of Somalia  
Office of the President

SHARCI LR. Lr. 11

TAARIIKH: 09/01/2016

OGGOLAANSHAHA SHARCIGA SAXAAFADDA

MADAXWEYNAHA J.F.S,

- Markuu Arkay:** Qodobka 87aad, Faqradda 1aad, Xarfaha ' A ' , ' ' B ' iyo ' c ' iyo Farqadda 2 ee Dastuurka KMG
- Markuu Arkay:** Qodobka 90aad, Xarfaha ' F ' ee Dastuurka KMG
- Markuu Arkay:** Warqadda Guddoomiyaha Golaha Shacabka Lr. 1057/3/1/9/15 ee 28/12/2015, kuna saabsan Ansaxinta Xeerka Saxaafadda
- Markuu Arkay:** Warqadda Ra'iisul Wasaaraha Lr. WWDHD/XW/60/2015 ee 27/04/2015 kuna Ansaxinta Golaha Golaha Wasiirada ee Hindise Sharciyeedka Saxaafadda
- Markuu Tixgeliyay:** In baahi loo qabo in la geliyo dardar xuriyadda saxaafada iyo inay habsami saxaafadda u Shaqayso si habsami ah, iyada oo la dhoowraayo dhaqanka suuban iyo sumcadda ee dadka Soomaaliyeed

Wuxuu soo saaray Xeerkaan:

Qodobka 1aad

Laga bilaabo maalinta uu Madaxwaynaha J.F.S. saxiixo sharcigaan, waxaa la oggolaaday Sharciga Saxaafadda ee halkaan ku lifaaqan.

Qodobka 2aad.

Waxaa la farayaa hay'adaha dhammaan ee khusayso saxaafadda inay si habsami le hula shaqeeyaan Saxaafadda, si door wayn uga qaadato saxaafadda wacyigelinta iyo guud ahaan horumarka ay hiigsanayaan dadka iyo dalkaba

Qodobka 3aad


Waa inu muwaadan kasto dhoowraa oo ilaaliya Madaxbanaanida Saxaafadda ee Sharcigaa tilmaamaayo.

Qodobka 4aad

Waxuu Sharcigaan dhaqangelayaa isla markii uu Madaxwaynaha J.F.S saxiixo waxaana lagu soo daabici doonaa Faafinta Rasmiga ah ee Jamhuuriyadda Federaalka Soomaaliya.

MUQDISHO, 09/01/2016

XAFIISKA HANTIDHAWRKA GUUD WAA LA DIWAAN GELIYEEY	
DIWAAN NO.	11/1014/2016
TAARIIKH	23/3/2016
SAXIIXA NO.	







Ref: ١٥٥٦/3/1/9/15: الرقم

Mogadishu, 28<sup>th</sup> December 2015 التاريخ

Ku: Madaxweynaha Jamhuuriyadda Federaalka Soomaaliya  
Muqdisho.

Ku: R/Wasaaraha Xukuumadda Federaalka Soomaaliya  
Muqdisho.

Og: Wasaaradda Warfaafinta, Dhaqanka iyo Dalxiiska.  
Muqdisho.

Og: Garyaqaanka Guud ee Dawladda.  
Muqdisho.

Og: Hanti-Dhowrka Guud ee Dawladda.  
Muqdisho.

Og: Guddiga Warfaafinta, Wacyigelinta, Dhaqanka, Boostadda iyo Isgaarsiinta  
L/H. Golaha Shacabka

Og: Xoghayaha Guud ee Golaha Shacabka  
L/. Golaha Shacabka.

Og: Agaasimaha Waaxda Shuruucda  
L/H. Golaha Shacabka

Ujeedo: Ansixinta Xeerka Saxaafadda.

M.ne Madaxweyne;


Waxaan kuugu wargelinayaa inuu Golaha Shacabka Jamhuuriyadda Federaalka Soomaaliya go'aan ka gaaray ansixinta Xeerka Saxaafadda oo halkan ku lifaaqan, wuxuuna Golaha Shacabka Kalfadhiga 7aad ee fadhigiisii 24aad 28<sup>kii</sup> Diseembar 2015 oo ka dhacay Xaruntiisa Caasimadda Jamhuuriyadda ee Muqdisho ku ansixiyey cod furan oo u dhacay sidatan hoos ku xusan:




- Xildhibaanad Oggolaadeen: 139 (Boqol Sodon iyo Sagaal Xildhibaan).
- Xildhibaanada diidey: 0
- Xildhibaanada ka aamustay 3 (Seddax Xildhibaan).

Haddaba, M.ne Madaxweyne waxaan si waafaqsan Qodobka 90-aad xarafka (f) ee Dastuurka JFS kaaga codsanaynaa in aad go'aanka Golaha ku oggolaato Xeer-Madaxweyne, si uu Sharci u noqdo looguna soo saaro Faafinta Rasmiga ah ee Dawladda si waafaqsan Qodobbada 84-aad iyo 85-aad ee Dastuurka JFS.

Anigoo huba in waajibkaaga Dastuuriga aad ka gudan doonto, waxaad magaca Golaha Shacabka nooga guddoontaa salaam diiran iyo qaddarin gaar ah.



M.ne Muxamad Sh. Cusmaan "Jawaari"  
Guddoomiyaha Golaha Shacabka



MJ/AM

Tell: +252 612224442/ +252 615577472

E-mail: [speaker@parliament.gov.so](mailto:speaker@parliament.gov.so)


Website: [www.parliament.gov.so](http://www.parliament.gov.so)



## ANSIXINTA XEERKA SAXAAFADDA.

### Guddoomiyaha Baarlamaanka JFS

Tirada Xubnaha Codeysay 142: Oggol (139) Diidmo (0) ka aamustay (3)



Taariikh: 28<sup>th</sup> December 2015


Saxiix: M. ne Muxanmad Sh. Cusmaan "Jawaari"

### Guddoomiye ku-xigeenka 1aad- Baarlamaanka JFS

Taariikh: 28<sup>th</sup> December 2015

Saxiix: M. ne Jeylaani Nuur Ilikar

### Guddoomiye ku-xigeenka 2aad- Baarlamaanka JFS



Taariikh: 28<sup>th</sup> December 2015

Saxiix: M. ne Mahad Cabdalla Cawad





Jam huuriyadda Federaal ka  
Soomaaliya  
Golaha Shacabka  
Guddiga Warfaafinta, Wacyigalinta  
Dhaqanka, Boostada & Isgaarsiinta



جمهورية الصومال الفدرالية  
مجلس الشعب  
لجنة الإعلام والثقافة والاتصالات

Federal republic of Somalia  
House of the People  
Committee of Information, Culture, Post & Telecommunication

Taariikh 26/12/2015

Ku: Guddoomiyaha Baarlamaanka Federaalka Soomaaliya

Ku: Dhamaan xubnaha Baarlamaanka Federaalka Soomaaliya

Mudane Guddoomiye,

Mudanyaal,

Guddiga Warfaafinta, Wacyigalinta, Dhaqanka, Boostada iyo Isgaarsiinta waxay halkan idiinku soo gudbinayaan warbixin ku saabsan Xeerka Saxaafadda. Waxaa 24-kii November, 2015, ka dhacay hotelka City Palace shir dhex maray Wasaaradda Warfaafinta iyo Wasaaradaha Warfaafinnada Dowlad Goboleedyada oo looga hadlayay horumarinta warfaafinta.

Intii aan shirka la furin waxay Dowlad Goboleedyada ka codsadeen Guddoomiyaha iyo Guddoomiye ku xigeenka Guddiga Warfaafinta ee Baarlamaanka, in la siiyo waqti dheeraad ah oo ay ku soo daraan aragtidooda, waxaana la siiyay 10 beri oo markii dambe Guddoomiyaha Baarlamaanku ka dhigay 15 beri.

Markii muddadii ay dhamaatay wax war ahna aan ka weynay ayaan waxaan gelinay Akhrintii 3-aad 14-ka Bisha December 2015, akhrintii 3-aad kolkuu sharcigu marayo sida uu qorayo Qodobka 50-aad Faqradiisa 1-aad waa in cod la galiyaa 3 maalmood ka dib.

Guddi ahaan waxaa nasoo gaadhay email taariikhdu markay ahay 21-kii December 2015, oo uu soo gudbiyay xoghayaha Baarlamaanka Mudne Buux oo ku saabsan warqad ka timid Wasaaradda Warfaafinta Puntland, kolkii aan dhuuxnay warqadda oo ka hadlaysay Qodobbada 5.1, 8.1, 9.1, 13.1, 14.1, 16.1, 18.1 iyo 34.1 ee Xeerka Saxaafadda, waxaana soo caddaatay iney ka hadlayaan awood qeybsi. Waxaana soo muuqatay iney gar u leeyihiin in wasaaradda warfaafinta kala tashato dowlad goboleedyada diyaarinta xeerhoosaad sida ku cad Qodobka 40-aad ee Xeerka Saxaafadda oo aan beddelnay Farqadda (B) sida soo socotana aan u qornay iyadoo xeerka aan wax kale laga beddelin:-

"Inuu hirgalinayo xeerhoosaadka lagu dhaqan galinayo Xeerka Saxaafadda oo ay ku heshiiyaan, wada jirna u soo saaraan Wasaaradda Warfaafinta iyo Wasaaradaha Warfaafinta Dowlad


JAMHUURIYADDA FED. SOOMAALIYA  
GOLAHA SHACABKA  
SOO GELID  
NO: 1742  
TR: 28/12/2015  
SAXIIX: [Signature]



Goboleedyada iyo Guddiga Saxaafadda Soomaaliyeed hadday tahay Qodobka 5.1(T) oo ah ganaax lacageed, Qodobka 9.1 Bixinta Shatiyada, Qodobka 13.1 oo faraya Codsiga Ruqsadda Warbaahinta jirtay 45 maalmood gudahood marka sharcigu dhaqan galo, Qodobka 17.1 Khidmadaha, Qodobka 18-aad Diiwaan gelinta Suxufiyiinta iyo Qodobka 34-aad Khidmadda lagu fiirsado TV-ga.”

**Guddoomiyaha Guddiga**

Xil. Cabdi Xaashi Cabdullaahi

  
\_\_\_\_\_





Federal Republic of Somalia  
House of the People  
Office of the Speaker

Ref: GSH/707/15

Date: 13/05/2015

Ku: Dhammaan Xildhibaanada Baarlamaanka

=Muqdisho=

Og: Xoghayaha Guud ee Golaha Shacabka

Ujeedo: Soo Gudbin Hindise-Sharciyeedka Saxaafadda Dalka.  
Mudanayaal,

Waxaan si xushmad iyo qadarin leh idinkugu soo gudbinayaa **Hindise-Sharciyeedkan** kor ku qoran ayadoon oo uu soo gaaray Golaha 27/04/2015.

Sidaa awgeed, waxaan ku rajo weynahay in aad waajibaadkiina Dastuuriga ah ka gudataan.

MAHADSANIDIIN

M.ne Muxammad Sh. Cusmaan "Jawari"  
Guddoomiyaha Golaha Shacabka



Tell: +252-612224441 / +252-699319137

E-mail. [mojawa@online.no](mailto:mojawa@online.no)





Ku: Guddoomiyaha Golaha Shacabka

=Muqdisho=

Og: Madaxweynaha Jamhuuriyadda Federaalka Soomaaliya

=Muqdisho=

**Ujeedo:- Soo Gudbin Hindise Sharciyeedka Saxaafadda Dalka**

**Mudane Guddoomiye;**


Iyadoo aan tixraacayo warqadda summaddeedu tahay XRW/GB/000194/09/2014 ee 01/09/2014, ujeeddadeeduna ahayd Soo Gudbin Hindise-sharciyeedka Saxaafadda Dalka, oo ay Xukuumaddii hore ku ansixisay go'aanka Golaha Wasiirrada ee summaddiisu tahay SHGW.00.47.09.14 ee soo baxay 01/09/2014, iyo warqadda summaddeedu tahay WWDHD/XW/54/2015 ee soo baxday 21/04/2015, kana soo baxday Wasaaradda Warfaafinta, Dhaqanka iyo Dal-xiiska, kuna saabsansan codsi in aan mar kale dib idinkuugu soo gudbiyo Hindise sharciyeedka Saxaafadda Dalka.

Sidaa darted, Mudane Guddoomiye waxaan halkaan kuugu soo gudbinayaa Hindise Sharciyeedka Saxaafadda Dalka oo noo leh mudnaan gaar ah, si aad uga gudataan waajibaadkiina Dastuuriga ah, waxaana idinka codsanaynaa in aad fududeysaan ansixinta Hindise sharciyeedkan maadaama baahi weyn loo qabo dhaqan-gelintiisa

**Naga Guddooma Salaan Diiran**



Mudane Cumar Cabdirashiid Cali Sharmaarke  
Ra'iisul Wasaaraha Xukuumadda J.F. Soomaaliya







FEDERAL REPUBLIC OF SOMALIA  
Ministry of Information, Culture & Tourism  
Office of the Minister

SUMMAD: WWDHD/XW/60/2015

Date: 27/04/ 2015

Ku: Ra'iisul Wasaaraha Soomaaliya  
Mudane Cumar cabdirashiid Cali

=Muqdisho=

Uj: Sharciga Warbaahinta Dalka

Mudane Ra'iisul Wasaare,

Waxaan halkan kuugu soo gudbinayaa Sharciga Warbaahinta dalka oo ay hore u ansixiyeen golihii Wasiiradda ee inaga horeeyey loona gudbiyey golaha shacabka, hase ahaatee dib loo soo celiyey ka dib markii Sharciga Warbaahinta iyo Sharciga Isgaarsiinta dalku meelo isaga hor imaadeen, ka dibna laga codsaday labada Wasaaradood ee Warfaafinta, iyo Boosta iyo Isgaarsiinta in ay isi soo waafajiyaan.

Hadaba, sida ku cad heshiiskii labada Wasaaradood gaareen ee uu goob jooga ka ahaa Gudiga Barlamaanka ee Warfaafinta, dhqanka iyo Isgaarsiinta, waxaanu si buuxda u kala saarnay shaqada iyo waajiabaadka labada wasaaradood iyo labada guddi ee la dhisi doono marka sharciyagan la ansixiyo, waxaanuna ku heshiiney in labada sharciba la horgeeyo Barlamaanka Soomaaliyeed, ka dibna markii ay aqrinta koowaad maraan gudiga Barlamaanku is waafajiyo oo meelaha yar yar ee ay isaga hor imaanayaan gudigu wax ka bedelo.

Mudane Ra'iisul Wasaare, hindise sharciyeedkan warbaahinta dalku wuxuu daruuri u yahay jaangoynta, hagista iyo sharciyenta Warbaahinta dalka oo aan hada lahayn wax siyaasad ama sharci dawladeed ah oo lagu dhaqo, wixii qarash ah ee ku baxaya hirgelintiisana waxaa laga bixinayaa budgetka Wasaaradda, sidaas awgeed, waxaan kaa codsanayaa in aad naga ogolaato in loo' gudbiyo golaha shacabka, laguna daro sharciyada hor-tebinta leh.

Mahadsanid

Mudane Maxamed Cabdi Xayir  
Wasiirka Warfaafinta, Dhaqanka iyo Dalxiiska







# **Jamhuuriyadda Federaalka Soomaaliya**

## **XEERKA SAXAAFADDA**



**Qodobka 1aad:  
Erey Bixin**

**Guddi:** Waa Guddiga Saxaafadda.

**Saxaafad Shisheeye:** Waa saxaafad milkiyaddeeda ay leeyihiin dad aan Soomaali ahayn

**Wasiir:** Waa Wasiirka Warfaafinta.

**Wasaarad:** Waa Wasaaradda Warfaafinta.

**Warbaahinta:** Waa gudbin barnaamijyo kala duwan oo loo isticmaalo qalabka warlaliska ama sataliteka.

**Warbaahinta Daabacan:** Waa warbaahinta lagu faafiyo qaab qoraal ah, sida wargeysyada, majalladaha, iwm.

**Warbaahinta gaarka ah:** Waa warbaahin ay leeyihiin dad ama hay'ado gaar ah.

**Noocyada warbaahintu:** Waxay u kala bixi karaan sida wargeysyada majallaadka, idaacadaha, telefeshinnada iyo websiteyada.

**Warbaahinta Danabeysan (Elektarooniga):** Waxaa loola jeedaa raadiyaha, telefishanka (cable Television) iyo internetka.

**Saxaafadda Daabacan:** Waxaa loola jeedaa Wargeysyada, Joornaallada (todobaadle, bille ama Sanadle), tabeellayaasha ama bullatiin.

**Warbaahin Qaran:** Waa saxaafadda ay maamusho isla markaana maal-geliso Dawladdu.

**Warbaahin Gaar ahaaneed:** Waa saxaafadda milkiiluhu yahay shakhsi gaar ah, urur siyaasadeed, urur dhaqaale ama urur bulsho.

**Suxufi:** Qofkasta oo leh aqoon saxaafadeed kuna shaqeeya, lehna ruqsad uu ku shaqeeyo.

**Madbacad (Printing House):** Waa hannaan ku dhisan farsamo adeegyo daabacaadeed loona isticmaalo qalabka wax lagu qoro.

**Milkiile Goob Daabacaad (Daabace):** Waa qofka leh ama wakiilka ka ah madbacadda.

**Soo saare (Publisher):** Waa milkiilaha ama qofka haysta ruqsadda lagu daabaco buugag ama qoraalo aan waqti xaddidan lahayn.

**Faafin (Dessiminate):** Waa hawsha gudbinta wararka iyo farriimaha loo adeegsado qalabka warbaahinta.



**Shirkad soo saarta Filimada (Movies Production Company):** Waa shirkad soo saarta filimada maqalka iyo muuqaalka.

**Machadka Tababarka Saxaafadda:** Waa dugsi bixiya tababar xirfad saxaafadeed.

**Xarun Tarjumaad:** Waa goob sharciyeysan oo ruqsad u haysata tarjumaadda qoraallo ku qoran luqado kala duwan.

**Wakaalad Warar:** Waa hay'ad sharciyeysan oo ururisa isla markaana faafisa xogta warbaahinta.

**Shirkad Xayeysiin:** Waa shirkad ganacsi oo haysata oggolaansho sharci ah soona saarta xayeysiin.

**Xaq dhowr (Copy Right):** Waa ilaalinta lahaanshaha fikirka ama hal-abuurka iyo qoraalada.

**Tafatire Guud (Editor-in-Chief):** Waa qofka mas'uulka ka ah maamulka iyo waxa ku soo baxa madbacad, wargeys, idaacad, telefshan iyo websiteyadda.

**Raadiyo:** Waa warbaahin guud oo maqal ah.

**Telefshan:** Waa warbaahin guud oo maqal iyo muuqaal ah.

**Cable Network:** Waa warbaahin maqal iyo muuqaal ah oo baahisa barnaamijyo maxalli, caalami, waxbarasho, dhaqan iyo madadaalo oo loo tebiyo ciddii dalbata.

**Xayeysiin (Advertisement):** Waa adeeg lagu soo saaro barnaamij qoraal, maqal iyo muuqaal ah iyadoo shirkadda xayeysiintu ay khidmad ka qaadeyso shaqsiga ama hey'adda xayeysiinta loo sameeyey.

**Deeq (Donation):** Waa tabaruc nooc kasta oo taakulayn ah, mid dhaqaale ama dhiirrigelin saxafadeed oo uu bixiyo shakhsi ama hay'ad.

### **Qodobka 2aad: Mabaadi'da Guud**

**2.1-** Xeerkan waxuu ku saleeyan yahay mabaadi'da ku tilmaaman **Qodobka 18<sup>aad</sup>** ee Dastuurka kumeel gaarka ah iyo Heshiisyada Caalamiga ah ee khuseeya arrimaha warbaahinta oo ay dowladda Soomaaliyeed dhinac ka tahay.

### **Qodobka 3aad: Xorriyadda Saxaafadda**

**3.1-** Saxaafaddu way u madax-bannaan tahay fulinta hawlaheeda saxaafadeed ama warbaahineed ee noocyada kala duwan ayadoo dhowreysa shuruucda iyo anshax saxaafadeedka (code of conduct).

**3.2-** Xorriyadda hadalka iyo fikirka waxaa loo fulinayaa sida ku xusan Dastuurka ku meel-gaarka ah (**Qod. 18<sup>aad</sup>**) oo qeexaya xorriyadda ra'yiga iyo afkaarta, axdiyada



caalamiga ah, kuwa qaaradeed iyo goboleed ee Soomaaliya ay qeybta ka tahay iyo xeerkan lagu dhaqan galinayo dastuurka.

- 3.3-** Dhammaan warbaahinta gaarka ah ama tan Dowladda wararkooda faaf-reeb laguma sameyn karo, haddii ay shaqadooda u gudanayaan si waafaqsan shuruucda dalka ama aan ka hor-imaanayn sharciga. lagumana khasbi karo faafinta warar u daneynaya dhinac gaar ah.
- 3.4-** Waxaa reeban in warfaafinta madaxa bannaan lagu khasbo iney faafiyaan warar ka hor imaanaya maslaxadda dalka, nabad galyada, dhaqaalaha, siyaasadda iyo bulshada ama u danaynaya cid gaar ah.

#### **Qodobka 4aad:**

##### **Arrimaha ka reeban warbaahinta xorta ah**

- 4.1-** Waxaa ka reeban warbaahinta xorta ah ee madaxa bannaan ha noqoto mid gaar ah ama mid dowladeed arrimaha soo socda:
- B-** Arrimaha ku xusan qodobka 3aad faqraddiisa 3aad ee xeerkan.
  - T-** Baahin warar been abuur ah
  - J-** Hurinta colaadda ama dhiirri galinta qabyaaladda
  - X-** Dacaayad aan sal lahayn oo loola jeedo shaqsi ama hay'ad, baahin warar nacayb iyo xag jirnimo ku salaysan.

#### **Qodobka 5aad:**

##### **Ku xad gudubka xeerka saxaafadda**

- 5.1-** Haddii aysan ka dhalan dembi ka culus (criminal offence) cid kasta oo ku xad gudubta xeerkan ha noqoto wariye ama mas'uul xarun warbaahineed waxaa la raacayaa arrimaha soo socda:
- B-** In marka hore la siiyo digniin qoraal ah mas'uulka xarunta warbaahinta ama suxufiga.
  - T-** Ganaax lacageed oo dhan shilin Soomaali u dhigma 500 ilaa 3000(shan boqol ilaa saddax kun oo Doolar), kaasoo lagu ganaaxayo tifatiraha, suxufiga ama mas'uulka xarunta warbaahinta ee jebiya sharcigan ama anshaxa warbaahinta, marka laga reebo wixii fal dambiyeed ah ee loo gudbinayo ha'adaha ku shaqada leh.
  - J-** Haddii suxufiga, tifatiraha ama mas'uulka xarunta warbaahintu ay u hoggaansami waayaan bixinta ganaaxa waqtigii loo xaddiday waxaa loo gudbinayaa maxkamadaha awoodda u leh.



**X-** Haddii suxufiga, tifatiraha ama mas'uulka warbaahineed ay ku kacaan falalka ku xusan qodobka 3aad ee xeerkan waxaa loo gudbinayaa xeer ilaalinta qaranka oo horgeynaysa maxkamadaha awoodda u leh.

**Kh-** Maxkamadaha ayaa leh hab-raaca loo marayo go'aan-ka-gaarista marka ay jiraan tuhun fal-dembiyeedyo (criminal offences) dhacay si loo joojiyo xad-gudubyadaas.

#### **Qodobka 6aad:**

##### **Waxtarka Xeerka Saxaafadda**

**6.1-** Waxatarka xeerka saxaafaddu waa nidaaminta howlaha kala duwan ee warbaahinta iyo barnaamijyada lagu wacyi galinayo bulshada laguna gaarsiinayo xogta dhabta ah ee waxtarka u leh ayadoo la dhowrayo xeerkan iyo anshaxa saxaafadda

**6.2-** Xeerku wuxuu nidaaminayaa qaabka ay u wada shaqeynayaan Wasaaradda Warfaafinta, Guddiga Saxaafadda, ururrada saxaafadda dalka, suxufiyiinta iyo inta ay khusayso saxaafaddu ayadoo la dhowrayo sharciga iyo anshaxa suuban.

#### **Qodobka 7aad:**

##### **Ujeedooyinka Xeerka Saxaafadda**

Ujeedooyinka xeerka warbaahinta waa:

**B-** Dejinta mabaadi'da siyaasadeed iyo sharci ee hagaya warbaahinta.

**T-** Hormarinta, dhowrista iyo ixtiraamka xorriyadda hadalka iyo kala duwanaashaha warbaahinta.

**J-** Dhiirri-gelinta warbaahinta gaarka ah iyo tan guud oo leh hal abuur xaqiiqada ku salaysan.

**X-** Horumarinta dhammaan noocyada kala duwan ee warbaahinta iyo horumarinta u isticmaalka adeegsiga teknoolojiyadda.

**Kh-** Dhiiri galinta iyo dammaanad qaadka jiritaanka qaybaha kala duwan ee warbaahinta si waafaqsan xeerkan.

#### **Qodobka 8aad:**

##### **Ruqsadda Warbaahinta**

**8.1-** Sharcigu wuxuu xeerinayaa sameynta qorsha qaran oo lagu qaybiyo ruqsadaha warbaahinta dowladdu bixiso si loogu adeegsado horumarinta kala duwan ee



warbaahinta hase yeeshee qaybinta iyo qorshaynta hirarka waxaa mas'uul ka ah Wasaaradda Boostada iyo Isgaarsiinta waxayna u kala horeynayaan in marka hore la helo ruqsadda Wasaaradda Warfaafinta ka dibna ay u gudbisoo Wasaaradda Isgaarsiinta oo ka mas'uul ah bixinta hirarka sida ku xusan xeerka isgaarsiinta.

- 8.2-** Xeerkani wuxuu dejinayaa hannaan cusub oo lagu bixinayo shatiyada warbaahinta cusub, iyo aqoonsiga iyo rasmiyeynta warbaahintii jirtay oo la waafajinayo xeerkan.
- 8.3-** Hannaankan wuxuu noqonayaa mid ku saleysan qiimeyn lagu sameeyo codsiyada, waxaa kale oo jiri kara codsiyo laga qabto kuwa mudan, gaar ahaan goobaha adeegooda warbaahineed uu yar yahay.
- 8.4-** Hannaanka Xeerkani wuxuu si cad u muujinayaa qaabka codsiyada loo maareynayo, xilliga kama dambeysta ah ee codsiga la qabanayo, waxa lagu qorayo codsiga iyo qaabka lagu qiimaynayo codsiyada.

#### **Qodobka 9aad:**

##### **Nidaamka Shatiyada lagu Bixiyo**

**9.1-** Nidaamka loo raacayo bixinta shatiyada waxay noqoysaa:

**B-** Waa inay jirtaa baahi loo qabo warbaahintan waafaqsantahayna qorshaha qaranka.

**T-** In codsaduho leeyahay awood dhaqaale oo uu ku daboolo adeegga warbaahineed ee uu codsanayo bixintiisa.

**J-** Waa inay dhiiri galinayso kala duwanaanta adeegga warbaahinta

#### **Qodobka 10aad:**

##### **Diidmada Codsiga Shatiga**

**10.1 -** Cidda bixinaysa shatiga waa in ay soo bandhigtaa sababo qoraal ah oo ay ku caddeynayso go'aanka diidmada ah ee ay qaadatay, waxaana looga caban karaa go'aankaas maxkamadaha awoodda u leh

#### **Qodobka 11aad:**

##### **Shuruudaha Shatiga**

**11.1-** Sharcigu wuxuu si cad u qeexayaa shuruudaha guud ee uu shati kasta wato waxayna noqonayaan sida soo socota:

**B-** Magaca qofka oo buuxa, shirkad ama urur, cinwaanka cidda codsanaysa.



**T-** Nooca warbaahinta iyo deegaanka looga baahan yahay in laga furo.

**J-** Dhaqaalaha ku baxaya iyo cidda bixinaysa iyo hadafka laga leeyahay in lagu gaaro.

**X-** Cidda ka mas'uul ah maamulkeeda.

**Qodobka 12aad:  
Furasho Warbaahin**

**12.1-** Hadii aan sharcigu si kale u sheegin waxaa loo oggol yahay inay furato warbaahin cid kasta oo danaynaysa ayadoo la raacayo xeerkan iyo shuruucda kale ee dalka, ka dib markii la soo buuxiyo shuruudaha ku xusan qodobka 11aad lana helo ruqsadda loo baahan yahay.

**12.2-** In qalabka uu keensanayo ama uu ku hawl-gelayo uusan ahayn mid wax u dhimaya degaanka, caafimaadka bulshada iyo hab-sami ula-shaqeynta warbaahinta kale.

**Qodobka 13aad:  
Xilliga kala guurka**

**13.1-** Kadib dhaqan galka sharcigan warbaahinnada horey u jiray waxay soo weydiisanayaan ruqsad muddo 45 cisho gudahooda, waxaana la waafajinayaa sharcigan.

**13.2-** Ma shaqeyn karto warbaahin aan ruqsad ka haysan hay'adaha ku shaqada leh ka dib dhaqan galka sharcigan.

**Qodobka 14aad:  
Guddiga Saxaafadda Soomaaliyeed**

**14.1-** Waxaa lagu dhisey xeerkan guddi madax bannaan oo aqoon u leh saxaafadda iyo shuruucda dalka u yaalla. Tirada Guddigu waxay noqoneysaa 09 (Sagaal) Xubnood, xubnahaas oo ka kala imaanaya:

- Warbaahinta dowladda 3 xubnood.
- Warbaahinta gaarka ah 3 xubnood.
- Ururrada bulshada rayidka 3 xubnood oo ka kala imaanaya: Guddiga Xuquuqul Insaanka, Ururka Haweenka iyo Ururka Qareennada Soomaaliyeed.



- 14.2-** Magaca Guddiga waxa uu noqonayaa '**Guddiga Saxaafadda Soomaaliyeed (GSS)**', waxaana lagu soo magacaabayaa sida soo socota:-waxaa golaha wasiirada u soo jeedinaya wasiirka wasaaradda warfaafinta, kadib markii goluhu ansixiyana waxaa dikreeto ku soo saaraya Madaxweynaha Jamhuuriyadda Somaaliya waxaana lagu soo saarayaa faafinta rasmiga ah. Xilka qaadista guddigan waxaa loo marayaa qaabkii lagu soo magacaabey.
- 14.3-** Guddiga ayaa noqonaya mid u madax-bannaan hawlaha fulintiisa loo igmaday, waxaana uu dhowrayaa sharciga oo keliya.
- 14.4-** Guddiga waqtigiisu wuxuu noqonayaa 4 sano oo loo cusbooneysiin karo haddii loo baahdo
- 14.5-** Xubin kasta oo guddiga ka mid ah waxay xilkeeda ku waayeysaa sida soo socota:-
- B-** Geeri ama arrin kasta oo si lama fillaan ah ugu timaadda xubinta keentana iney xilkeeda gudan weydo.
  - T-** Xilka oo xubintu iska casisho.
  - j-** Waqtiga xilka oo ka dhammaada.
  - x-** Xukun Maxkamdeed oo ku dhaca xubin kasta oo guddiga ka mid ah.
- 14.6-** Soo buuxinta booska bannaanaada waxaa loo marayaa sidii markii hore lagu soo xulay.

**Qodobka 15aad:  
Mas'uuliyadda Guddiga**

Mas'uuliyadda Guddiga waxaa ka mid ah:

- 15.1-** Ilaalinta anshaxa suxufiyiinta ka shaqeeya saxaafadda iyo ku dhaqanka xeerka saxaafadda Soomaaliyeed
- 15.2-** Xallinta khilaafaadka ka dhasha ku dhaqanka xeerkan.
- 15.3-** Dhexdhexaadinta iyo xallinta gafafka laga tabanayo saxaafadda dowladda iyo tan gaarka ah, marka laga reebo wixii fal dambiyeed ah.
- 15.4-** Abaalmarinta iyo anshax marinta suxufiyiinta, tifatiraha iyo mas'uuliyiinta xarumaha saxaafadda.



15.5- Ka tala bixinta siinta iyo kala noqoshada ruqsadaha si ay wasaaraddu go'aan uga qaadata.

15.6- Xallinta cabashooyinka ka yimaada suxufiyiinta, warbaahinta, hay'adaha kale iyo bulsho weynta marka laga reebo wixii fal dambiyeed ah.

15.7- Diyaarinta iyo u gudbinta wasaaradda miisaaniyadda guddiga.

#### **Qodobka 16aad:**

##### **Diiwaan-gelinta**

16.1- Warbaahin kasta sida: Idaacad, Telefeshin, Wargeys, Madbacad, Sheneemooyin, Dugsiyada tababarka saxaafadda, Shirkadaha xayeysiinta iwm (ha ahaadeen qaar hadda shaqeyya ama kuwa cusub oo la furayo) waxay iska diiwaan-gelinayaan Wasaaradda Warfaafinta.

16.2- Canshuurta diiwaan galintu waa hal mar hase yeeshee waxay bixinayaan xarumaha warbaahintu canshuurta shatiga sannadkiiba mar, waxaana loo marayaa qaabka canshuuraha dowladda.

#### **Qodobka 17aad:**

##### **Khidmadaha**

17.1- Warbaahin kasta oo gaar loo leeyahay ama shisheeye ee ka howl gasha dalka, waxaa laga qaadayaa khidmad diiwaan-gelin iyo khidmad-sannadeed sida ku xusan qodobka 16aad, waxaana lagu xaddidayaa shaxda tariifada canshuuraha dalka.

#### **Qodobka 18aad:**

##### **Diiwaanka Suxufiyiinta**

18.1- Qof kasta oo ku shaqaynaya xirfadda saxaafadda waxaa lagu qorayaa diiwaanka suxufiyiinta ka dib marka la hubiyo aqoontiisa saxaafadeed, guddiguna ka qaado imtixaanka xirfadda saxaafadda waxaana la siinayaa warqadda aqoonsiga suxufiga ka dib markuu ka gudbo imtixaankaas.

18.2- Suxufiyiinta shisheeye ee wakiilka ka ah wakaaladaha wararka shisheeye, idaacadaha iyo taleefishanada waxay dhowrayaan shuruucda dalka, mana lagu dhaqayo faqradda 1aad ee qodobkan, hase yeeshee wariyeyaasha shisheeye ee madaxa bannaan ee aan cidna wakiilka ka ahayn waa in ay soo buuxiyaan faqradda 1aad ee qodobkan.



**Qodobka 19aad:**  
**Milkiyadda, Maamulka iyo Mas'uuliyadda**

- 19.1-** Warbaahin kasta oo gaar loo leeyahay oo ka howl gasha Jamhuuriyadda Soomaaliya waxay lahaanaysaa milkiile loogu soo hagaago oo leh milkiyaddeeda iyo maamule ka ma'suul ah hawl-fulinteeda.
- 19.2-** Codsiga diiwaan-gelinta iyo ruqsadda waa in lagu soo daraa warqadda lahaanshaha, magaca milkiilaha, xarunta ay ku shaqaynayso, cinwaankiisa gaarka ah iyo nooca warbaahinta.
- 19.3-** Codsiga waxaa kaloo lagu muujinayaa magaca, aqoonta iyo cinwaanka maamulaha, waana inuu noqdaa mid buuxiyay shuruudaha xeerkani ku xiray suxufiga.
- 19.4-** Milkiyadda iyo maamulka warbaahinta waxaa isku qaban kara hal ruux.
- 19.5-** Warbaahin kasta waxay yeelanaysaa cinwaan loogu soo hagaago sida cinwaan degaan, Sanduuq Boosto, telefoon lambar iyo e-mail.
- 19.6-** waxaa reebban in la diiwaan galiyo Hay'ad warbaahineed oo aan soo dhammeystirin shuruudaha kor ku xusan.

**Qodobka 20aad:**  
**Xilliga Ruqsad-bixinta**

- 20.1-** Warbaahinta soo buuxisa shuruudaha ku xusan xeerkan, waxaa la siinayaa ruqsad ay ku hawl-gasho muddo 30 casho gudahood ah. Haddii go'aanku noqdo diidmo in la diiwaan galiyo iyo in la siiyo ruqsadda waxay uga cabanayaan go'aankaas maxkamadaha awoodda u leh.
- 20.2-** Muddada la sugayo ruqsadda warbaahintu ma qaban karto wax hawl ah oo la xiriira adeegga warbaahinta haddii aysan ahayn warbaahin horay u jirtay.

**Qodobka 21aad:**  
**Xallinta Cabashada**

- 21.1-** Haddii daneeyaha soo codsaday oggolaansho furasho warbaahin cusub ama cusbooneysiinta mid horay u jirtay uu ku qanci waayo go'aanka Wasaaradda Warfaafinta iyo Guddiga Saxaafadda, codsadhaha waxaa u furan in uu cabashadiisa u gudbiyo maxkamadda awoodda u leh dhegaysiga dacwaddiisa.



**Qodobka 22aad:**  
**Waayidda Ruqsadda Diiwaan-gelinta**

- 22.1-** Hay'adda warbaahineed ee hore loo siiyey ruqsad, lana diiwaan-geliyey, waxay waayi kartaa xaqa ruqsadda, haddii ay ku hawl-geli-weydo muddo 6 (lix) bilood ah ama hakad galo adeeggeeda muddo dhan 3 bilood, isla markaana aan xiriir la soo sameyn Guddiga Saxaafadda Soomaaliyeed oo aysan diiwaan-gelin sababo maangal ah oo keenay dib-u-dhaca.
- 22.2-** Waxaa kaloo lagu wayn karaa in Hay'adda warbaahintu ku xad gudubto xeerkan lagana gaaro go'aan kama dambeys ah oo muujinaya ineysan u qalmin ka shaqeynta warbaahinta.

**Qodobka 23aad:**  
**Tilmaamo Muhiim ah**

- 23.1-** Daabacaad kasta, sida wargeysyada (ha ahaado maalinle ama mid xilliyeed), website ama nooc waliba oo daabacaad warbaahineed ah, waxaa waajib ah in ay ka muuqdaan magaca, taariikhda daabacaadda, tirsiga caddadka, deegaanka, magaca maamulaha iyo tifaftiraha.
- 23.2-** Wargeys kasta ee la soo saaro nuqulka (sample) ugu horreeya waxaa la dhigayaa Xusuus-dhawrka Guddiga Saxaafadda iyo Wasaaradda Warfaafinta.

**Qodobka 24aad:**  
**Wargelinta is-Beddelada**

- 24.1-** Is-bedel kasta oo ku yimaada milkiyadda, muuqaalka, awoodda iyo tayada warbaahin haysata ruqsad iyo diiwaan-gelin, mas'uulka hay'addaas wuxuu si dhaqso ah u wargelinayaa, Guddiga Saxaafadda Soomaaliyeed iyo Wasaaradda si loo diiwaan-geliyo is-beddelka ku yimid muddo 21 maalmood (maalmo shaqo) gudahood ah.
- 24.2-** Is-beddel kasta oo lugu sameynayo milkiyadda ama magaca warbaahinta waxaa lagu wargelinayaa Wasaaradda Warfaafinta, Guddiga Saxaafadda Soomaaliyeed iyo Maxkamadda Gobolka (haddii dacwadi jirto) si loo diiwaan-geliyo is-beddelka ku yimid hay'adda warbaahineed.



**Qodobka 25aad:  
Anshaxa Saxaafadda**

**25.1-** Sharciga Saxaafaddu wuxuu ku salaysan yahay mabaadi'da guud ee Dastuurka Qaranka.

**25.2-** Wasaaradda Warfaafinta iyo Guddiga Saxaafadda oo la-tashanaya Ururrada saxaafadda dalka waxay diyaarinayaan xeer hoosaadka anshaxa guud ee saxaafadda, kaas oo dejinaya qodobada la xiriira arrimaha ay ka mid yihiin:

**B-** Qadarinta Diinta Islaamka iyo dhaqanka suubban ee Soomaaliyeed.

**T-** Saxnimada iyo sugnaanta wararka iyo barnaamijyada, iyo ilaalinta ilaha qarsoon ee macluumaadka bixiya haddii aysan maxkamadi amrin in la sheego.

**J-** Ka-fogaanshaha faafinta ama daabacaadda muuqaallada iyo sawirrada ka hor imanaya anshaxa suubban ee bulshada.

**X-** Ilaalinta xaquuqda carruurta, sida in aan lugu takrifalin muuqaallada muujinaya duruufaha gaarka ah ee carruurta iyadoo aan oggolaansho rasmi ah laga haysan cidda ka mas'uulka ah ama maxkamad.

**KH-** Ixtiraamidda nolasha gaarka ah ee qofka, marka laga reebo xaalladaha lagu dhawrayo danaha guud ee dadweynaha.

**D-** Ka-fogaanshaha faafin muuqaallo naxdin leh sida jirka bani-aadamka oo la googooyey, fara-xumeyn iyo sawirro argagax ku abuuraya bulshada.

**Qodobka 26aad:  
Warbaahin aan Sharciyeysneyn**

**26.1-** Cid kasta oo furata ama hawl-gelisa warbaahin aan haysan oggolaansho iyo diiwaan-gelin rasmi ah, waxaa laga xirayaa warbaahinta, waxaana la horgeynayaa maxkamad, si sharciga loo mariyo.

**Qodobka 27aad:  
Wax-ka-beddel Sharci-darro ah**

**27.1-** Hay'addii warbaahineed ee si ku-talo-gal ah u soo saarta wargeys ama daabacaad aan ku salaysnayn sida Dawladda u diiwaan-gashan, iyadoo aan loo oggolaan is-beddelkaas, Guddiga Saxaafadda Soomaaliyeed iyo wasaaraddu waxay u gudbinayaan maxkamad si sharciga loo mariyo.



**Qodobka 28aad:**  
**Ruqsad Been-Abuur ah**

- 28.1-** Warbaahin kasta oo ka been abuurta ruqsadda diiwaan-gelinta ama sameysa qoraal lid ku ah shuruudihii ruqsadda lugu siiyey, Guddiga Saxaafadda Soomaaliyeed iyo Wasaaraddu waxay u gudbin karaan Maxkamadda awoodda u leh si sharciga loo mariyo.
- 28.2-** Warbaahinta ay ku caddaato ku xad-gudubka xeerkan iyo been abuurid ruqsadeed waxaa lagala noqon karaa ruqsadda kadib marka ay soo caddeyso maxkamadda awoodda u lihi.

**Qodobka 29aad:**  
**Faafin xog Been ah**

- 29.1-** Waxaa reebban in la faafiyo warar ama qoraallo been ah iyo dacaayad lid ku ah sharafta muwaadin, shakhsiyaad, hay'ad ama dawladda, iyadoo Warbaahintii falkaas ku kacda laga doonayo caddeyn dhab ah, haddii kale iney:
- B-** Raalli-gelin qoraal ah iyo saxid ka bixiso gefkeeda, kuna faafiso (qormada 1<sup>aad</sup> ee bogga hore) ee lagu daabacay ama isla barnaamijkii warbaahinta laga sii daayey warka, iyadoo raali-gelintaas ku sameynaysa muddo aan ka badnayn 48 saacadood gudahood laga bilaabo marka ay cabashadaasi soo gaarto.
- T-** U oggolaato muwaadinka ama hay'adda loo gefay in ay ka jawaabaan wararka ay u arkayaan in ay yihiin been-abuur ama sharaf-dhac lagu waxyeelaynayo sumcaddooda muddo 48 saacadood ah, iyadoo aan wax shuruud ah lugu xirin, waxaana lagu jawaabayaa isla wargeyska, bogga iyo qormadii warka lagu qoray, ama warbaahintii laga sii daayey, iyadoo aan la kala dhantaalin nuxurkeeda, si ay u gudbiso macnihii ay ku dhisnayd jawaabtu.
- J-** Haddii muwaadinka, qoyska, hay'adda ama Dawladda lagu been abuurtay ama la sharaf dilay ku qanci waayaan raalli-gelinta la bixiyey, waxay xaq u leeyihiin in ay u gudbiyaan maxkamadaha awoodda u leh dacwad lid ku ah been abuurkaas ayagoo ku soo bandhigaya cabashadooda.
- 29.2-** Warbaahinta waxaa kale oo ka reebban in ay faafiso gef ama xog meel-ka-dhac ku ah qof dhintay, qof aan qaan gaar ahayn ama qof aan dhimirkiisu dhammeyn oo aan is-difaaci karin, haddii ay taasi dhacdo, waxaa la dabbaqayaa faqradda 1<sup>aad</sup> ee qoddobkan iyo sharciga u dhigan difaaca dadka aan is difaaci karin.



### **Qodobka 30aad:**

#### **Magdhaw**

**30.1-** Qofka, qoyska ama hay'adda meel-ka-dhac loogu geysto qalabka warbaahinta, ee ku qanci waaya go'aannada ay Guddiga Saxaafadda Soomaaliyeed iyo wasaaraddu ku rideen xarunta warbaahineed waxaa uu xaq u leeyahay in uu u dacwodo maxkamadda awoodda u leh, iyadoo la raacayo qodobka 29aad ee xeerkan iyo shuruucda kale ee dalka.

### **Qodobka 31aad:**

#### **Faafin Khasab ah**

**31.1-** Hay'adda warbaahineed ee lagu helo arrimaha ku xusan qodobka 29aad ee xeerkan, laguna qaado xukun ganaax ah ama magdhaw la siiyo ciddii loo gafay, waxaa waajib ku ah in ay faafiso ama baahiso xukunka lagu qaaday, haddii ay ka baaqsato fullinta arrinkan, Guddiga Saxaafadda Soomaaliyeed ama Wasaaraddu waxay ku ganaaxi karaan ka sokoow magdhawgii lagu xukumay ganaax dhan \$1,000 - \$3,000 (Kun ilaa Saddex Kun Doolar) shilin Soomaali u dhigma.

### **Qodobka 32aad:**

#### **Wakaaladda Wararka Qaranka Soomaaliyeed (SONNA)**

**32.1-** Sharcigan wuxuu dib u howl galinayaa wakaaladda wararka Soomaaliyeed (SONNA) oo ay shaqadeedu tahay ururinta, gudbinta iyo qaybinta wararka dowladda sidoo kale (SONNA) waxay ururisaa wararka kale ee dalka, waana isha laga helo xogta dhabta ah ee dalka.

**32.2-** SONNA waxay ka jawaabaysaa codsiyada iyo baahida xogeed ee warbaahinnada Dawladda, kuwa gaar ahaaneed iyo kuwa caalamkaba.

**32.3-** SONNA waxay soo xigan kartaa wararka wakaaladaha caalamka iyo warbaahinnada gaar ahaaneed ee gudaha iyadoo xuseysa magaca warbaahinta ay soo xigatay.

**32.4-** SONNA waxay warka siisaa warbaahinta dawladda sida idaacadda, wargeyska, talefishinka, website-ka, iwm, kuwaas oo soo bandhigaya warar, barnaamijyo, filimo iyo madaddaalo ay kula tartami karaan warbaahinnada gaarka loo leeyahay.

**32.5-** SONNA iyo warbaahinta kale ee dawladdu waxay u madax-bannaan yihiin mihnaddooda saxaafadeed, iyagoo dhawraya sharciga iyo anshaxa saxaafadda.



**Qodobka 33aad:**  
**Adeegga Warbaahinta Dowladda**

- 33.1-** Xeerkani wuxuu xaqiijinayaa dhowrista sharciyeed ee ay helayso warbaahinta dowladdu (Public Broadcasting Service) oo u madax-bannaan tafaftirka wararkeeda iyo mihnaddeeda saxaafadeed.
- 33.2-** Adeegga Warbaahinta Dowladdu waa ka madax-bannaan yahay danaha mas'uuliyiinta dowladda, faragalin siyaasadeed iyo shirkadaha ganacsiga, iyadoo dhowraya shuruucda iyo anshaxa saxaafadda.
- 33.3-** Barnaamijyada warbaahinta dowladdu waa in ay ahaadaan kuwo dhex-dhexaad ah, xorna ka ah u-xaglin siyaasadeed, oo aan buunbuunin u sameynayn urur siyaasadeed, hay'adaha Dowladda, dano ganacsi ama fikrad shakhsiyadeed.
- 33.4-** Barnaamijyada ka baxa warbaahinta dowladda waa in ay kala duwanaadaan oo ay isugu jiraan kuwo ka hadla arrimaha bulshada, madaddaalo, waxbarasho iyo dhaqan looguna tala-galay qeybaha kala duwan ee bulshada, kana haqab-tiraya baahidooda warbaahineed.
- 33.5-** Barnaamijyadu waa in ay ku dhiirri-geliyaan una fududeeyaan muwaadiniinta ka qeyb-qaadashada hannaanka dimoqraadiyadda loo siman yahay, maamul-wanaagga iyaga oo la siinayo macluumaad wax-ku-ool ah, sax ah, oo waqtiyeysan, kuna aaddan arrimaha taagan oo ay danta ummaddu ku jirto.
- 33.6-** Barnaamijyada waa in ay ku jiraan arrimaha siyaasadda, dhaqaalaha, sayniska, caafimaadka, waxbarashada, diinta Islaamka, cayaaraha, bulshada, dhaqanka suubban iyo wararka gudaha iyo dibabadda.
- 33.7-** Warbaahinta Adeegga Bulshada(dowladda), marka laga reebo wararka iyo xogaha kale, waa in ay sameysaa madaddaalo hal-abuur leh, si ay ula tartanto warbaahinta ganacsiga ku dhisan.
- 33.8-** Barnaamijyadu waa in ay muujiyaan dhaqanka suubban ee Soomaaliyeed, una soo bandhigaan caalamka.
- 33.9-** Inta ay saamaxayso dhaqaalaha, farsamada iyo tiknoolajiyada hadba la heli karo, Warbaahinta Adeegga Bulshadu (dowladda) waa in ay qiimo la awoodi karo ku gaartaa dhammaan shacabka, oo aysan jirin koox gaar ah oo ka reeban in ay ka faa'iidaystaan.



- 33.10-** Warbaahinta Adeegga Bulshadu waa in ay dhiirri-gelisaa, horumarisaa qaabka maqalka iyo muuqaalka ah, iyadoo la adeegsanayo tiknoolajiyada cusub si ay u ballaarisoo gaaritaankeeda dalka oo dhan.
- 33.11-** Maadaama Warbaahinta Adeegga Dowladdu yahay mid madax-bannaan oo dhex-dhexaad ah, lacagaha ama taageero nooc waliba ah oo ay dawladdu siiso waa ka madax-bannaan yihiin ujeedooyin siyaasadeed iyo faragalin kale oo ka iman karta cid walba oo ay ku jiraan mas'uuliyiinta dowladdu.
- 33.12-** Warbaahinta Dowladdu taageerada ay heleyso waa inay noqotaa mid shuruud la'aan ah oo aan laga lahayn inay fuliso dano gaar ah.

**Qodobka 34aad:**

**Khidmadda lagu fiirsado TV-ga (TV license)**

- 34.1-** Cid kasta oo haysata ama fiirsata TV waxay bixinaysaa canshuurta TV-ga (TV license), waxaana xaddidaya khidmaddaas Wasaaradda Maaliyadda. Qof kasta oo u haysta TV inuu fiirsado waa inuu ku war geliyaa Wasaaradda Warfaafinta iyo Guddiga Saxaafadda si loogu xaddido khidmadda laga doonayo oo lagu qaadayo bulleeto ka diiwaan gashan xafiiska xisaabiyaha guud.

**Qodobka 35aad:**

**Suxufi**

- 35.1-** Suxufi waxaa noqon karo qof kasta oo leh aqoon jaamacad saxaafadeed, kana gudbay imtixaanka suxufiga laguna qoray diiwaanka saxaafadda sida ku cad qodobka 18aad ee xeerkan.
- 35.2-** Shaqaalaha kale oo aan ahayn suxufiyiinta ee ku hawlan saxaafadda iyo warbaahinta lehna waayo-aragnimo iyo aqoon la xiriirta xirfaddooda farsamo waxaa xil ka saran yahay inay dhowraan shuruucda, asluubta iyo anshaxa saxaafadda.
- 35.3-** Hawl-wadeennada saxaafadda ee ku xusan faqradda 2<sup>aad</sup> ee isla qodobkan waxaa la siinayaa dhawrista suxufiga oo kale.
- 35.4-** Tixgelinta heerarka xirfadeed ee saxaafaddu waxay ka mid yihiin waajibaadka warbaahinta.



## **Qodobka 36aad:**

### **Waajibka Suxufiga iyo Hay'addaha Saxaafadda**

- 36.1-** Suxufigu waa in uusan ku xad-gudbin xuquuqda qofka, hay'adaha, goobaha cibaadada, diinta islaamka, shuruucda dalka iyo dhaqanka suubban ee Soomaaliyeed.
- 36.2-** Suxufigu waa in uu dhawraa sharafka, lahaanshaha gaar ahaaneed, xuquuqda iyo karaamada dadka uu wararka ka qaadayo iyo kuwa uu tabinayoba isagoo muujinaya qaddarin iyo tixgalin.
- 36.3-** Suxufiga waxaa ka reebban in uu dheef ku helo xog ama sawirro gaar loo leeyahay haddii uusan oggalaansho ka helin cidda iska leh.
- 36.4-** Suxufiga waxaa u bannaan in uu soo bandhigo xogaha la xiriira fal-dembiyeed dhacay, haddii uu hayo caddeyn ku filan ama aysan ka hor imaaneyn sharciga.
- 36.5-** Mas'uuliyiinta warbaahineed oo kala ah milkiilaha, maamulaha, tafatiraha iyo weriyaha waxay mas'uuliyad ka saaran tahay hubinta in wararka iyo barnaamijyada ay baahinayaan yihiin kuwo xaqiiqada ku saleysan.
- 36.6-** Haddii warbaahintu ama weriyuhu uu helo xog uu qarsoon yahay qofkii laga soo xigtey, waa in ay qiimeeyaan kalsoonida lagu qabi karo ilo-wareedka iyo ujeeddada xogbixiyuhu isu qariyey haddii kale waxey masuul ka noqonayaan wixii ka yimaadda.
- 36.7-** Haddii warbaahintu u aragto in qarinta il-wareedka ay u wanaagsan tahay ammaanka xogbixiyaha iyo tan qaranka, waa ay sii dayn karaan warkaas, ayagoo aan faafin isha ay ka heleen xogtaas hase yeeshee waxay keydinayaan xog-bixiyaha iyo xogtaba iyadoo lasoo badhigayo markii loo baahdo. Soo bandhigidda xog-bixiyaha ama xogtaba waxaa amri kara maxkamad haddii isqabad yimaado.
- 36.8-** Haddii macluumaadka laga helay il-wareedka uu keenayo natiijo aan meel kale laga heli karin, isla markaana ay maxkamad soo codsatay in la ogaado bixiyaha xogta il-wareedka, waxay warbaahintu soo bandhigaysaa ciddii ay ka heleen il-wareedkaas iyo caddeymaha la xiriira kadib marka maxkammadda awooda u leh amarto, maxkammadda ayaana go'aan ka gaareyso qaabka loola kulmayo haddii ay qarsoodi noqoneyso iyo haddii kale.



**Qodobka 37aad:**  
**Xuquuqda Suxufiga**

- 37.1-** Suxufigu wuxuu xaq u leeyahay in la ilaaliyo amnigiisa, sharafkiisa iyo in uu mihiiddiisa ugu shaqeeyo si xor ah xogtana u soo bandhigo si waafaqsan xaqiiqada oo aan ka hor imaaneyn Qoddobka 36 aad faqraddiisa 1aad ee xeerkan.
- 37.2-** Suxufiga waa in la siiyaa xog kasta si uu ugu gudbiyo bulshada haddii aysan jirin sabab sharciga waafaqsan oo loogu diidi karo.
- 37.3-** Wasaaradda warfaafintu waxey u fududeyneysaa Suxufiyiinta fursadaha tababbarrada aqooneed oo kor loogu qaadayo aqoontooda xirfadeed si ay u gutaan waajibka ay bulshada u hayaan ha noqdaan kuwa dowladda iyo kuwa gaarka ahba.
- 37.4-** Milkiileyaasha qalabka warbaahinta iyo warfidiyeenadu, waxay yeelan karaan ururo u gaar ah oo ay ku midaysan yihiin si ay u difaacaan danahooda.
- 37.5-** Milkiileyaasha warbaahinta gaarka ah, waxay ilaalinayaan xuquuqda suxufiyiinta iyo farsamo-yaqaannada u shaqeeya iyagoo ula dhaqmaya sidan:
- B-** Waxey siinayaan mushaar u dhigma baahida noloshooda si loo ilaaliyo sharafta mihiidda saxaafadeed.
- T-** Waxey la galayaan heshiiska shaqada si waafaqsan sharciga shaqaalaha gaarka ah.
- J-** Illaalinta Saacadaha shaqada iyo fasaxyada.
- X-** Hubinta suxufiga in uu ku qoranyaha diiwaanka suxufiga heystana kaarka aqoonsiga suxufinnimo, sida uu qabo Qodobka 18aad ee xeerkan.

**Qodobka 38aad:**  
**Ilaalinta Xaqa Lahaanshaha (Copy right)**

- 38.1-** Warbaahinta waxa ay dhowreysaa xaqa lahaanshaha hal abuurka, curinta iyo qoraalada si waa faqsan shuruucda dalka iyo xeerarka caalamiga ah, waxaana la istimaali karaa oo kaliya marka fasax laga helo qofka ama hey'adda leh waxaana laga bixinayaa wixii cidda ogalaanshaha laga rabo ay ku qanceyso, waxaana lagu nidaamin doonaa xeer gaar ah oo ay soo saarto xukuumaddu.



**38.2-** Isticmaalka iyo xigashada xog ama ra'yi la soo min-guuriyey waxaa la xusayaa qofkii curiyey xogta la xiganayo, waxaana reebban in la soo minguuriyo xog aan la xusin ciddii curisay is la markaana aan laga heysan oggolaansho qofkii lahaa.

**38.3-** Waxaa reebban in la daabaco ama la badiyo qoraal, suugaan, sawirro, filimo, iwm oo aan oggolaansho looga haysan curiyaha ama soo-saaraha.

**38.4-** Haddii aan la dhawrin xuquuqda lahaanshaha ee ku xusan faqradda hore ee qoddobkan, qofka leh xaqa lahaanshaha ayaa xaq u leh in uu dacwad ka furto maxkamadda awoodda u leh si uu u ilaaliyo xaqiisa.

**Qodobka 39aad:  
Dhawrista Xeerkan**

**39.1-** Cabashooyinka la xiriira warbaahinta waxaa iska kaashanaya xallintooda Wasaaradda Warfaafinta iyo Guddiga Saxaafadda Soomaaliyeed, Ururrada Saxaafadda Soomaaliyeed, haddii ay cidda ay khuseysa ku qanci weydo waxaa la horgeyn karaa maxkamadda awoodda u leh.

**Qodobka 40aad:  
Kaalinta Wasiirka ee hergalinta xeerkan**

**40.1-** Wasiirka Wasaaradda Warfaafintu wuxuu awood u leeyahay:

**B-** Inuu hirgalinayo xeerhoosaadka lagu dhaqan galinayo Xeerka Saxaafadda oo ay ku heshiiyaan, wada jirna u soo saaraan Wasaaradda Warfaafinta iyo Wasaaradaha Warfaafinta Dowlad Goboleedyada iyo Guddiga Saxaafadda Soomaaliyeed hadday tahay Qodobka 5.1(T) oo ah ganaax lacageed, Qodobka 9.1 Bixinta Shatiyada, Qodobka 13.1 oo faraya Codsiga Ruqsadda Warbaahinta jirtay 45 maalmood gudahood marka sharcigu dhaqan galo, Qodobka 17.1 Khidmadaha, Qodobka 18-aad Diiwaan gelinta Suxufiyiinta iyo Qodobka 34-aad Khidmadda lagu fiirsado TV-ga.

**T-** In uu fadhi deg-deg ah isugu yeeri karo Guddiga Saxaafadda xaalad jirta awgeed iyo

**X-** In uu qaadan karo go'aan deg-deg ah oo la xiriira amniga oo ka dhalatey hey'adaha warbaahinta



**Qodobka 41aad:**

**Baabi'in**

**41.1-** Xeerkani waa xeerka Saxaafadda Soomaaliyeed iyo Suxufiga Jamhuuriyadda Soomaaliya, waxaana la baabi'iyey xeer kasta oo saxaafadeed oo ka soo hor-jeeda ama aan la socon karin xeerkan.

**Qodobka 42aad:**

**Dhaqan-gal**

**42.1-** Xeerkan wuxuu dhaqan-gelayaa marka uu ansixiyo Baarlamaanka Jamhuuriyadda Somaaliya, Madaxweynuhuna saxeexo, laguna soo saaro Faafinta Rasmiga ah ee Dawladda.



**Tusmo:**

Qodobka 1aad: Erey Bixin .....	1
Qodobka 2aad: Mabaadi'da Guud .....	2
Qodobka 3aad: Xorriyadda Saxaafadda .....	2
Qodobka 4aad: Arrimaha ka reeban warbaahinta xorta ah .....	3
Qodobka 5aad: Ku xad gudubka xeerka saxaafadda.....	3
Qodobka 6aad: Waxtarka Xeerka Saxaafadda.....	4
Qodobka 7aad: Ujeeddooyinka Xeerka Saxaafadda .....	4
Qodobka 8aad: Ruqsadda Warbaahinta.....	4
Qodobka 9aad: Nidaamka Shatiyada lagu Bixiyo.....	5
Qodobka 10aad: Diidmada Codsiga Shatiga .....	5
Qodobka 11aad: Shuruudaha Shatiga .....	5
Qodobka 12aad: Furasho Warbaahin.....	6
Qodobka 13aad: Xilliga kala guurka .....	6
Qodobka 14aad: Guddiga Saxaafadda Soomaaliyeed .....	6
Qodobka 15aad: Mas'uuliyadda Guddiga.....	7
Qodobka 16aad: Diiwaan-gelinta .....	8
Qodobka 17aad: Khidmadaha.....	8
Qodobka 18aad: Diiwaanka Suxufiyiinta.....	8
Qodobka 19aad: Milkiyadda, Maamulka iyo Mas'uuliyadda .....	9
Qodobka 20aad: Xilliga Ruqsad-bixinta.....	9
Qodobka 21aad: Xallinta Cabashada.....	9
Qodobka 22aad: Waayidda Ruqsadda Diiwaan-gelinta .....	10
Qodobka 23aad: Tilmaamo Muhiim ah .....	10
Qodobka 24aad: Wargelinta is-Beddelada .....	10
Qodobka 25aad: Anshaxa Saxaafadda .....	11
Qodobka 26aad: Warbaahin aan Sharciyeysneyn.....	11
Qodobka 27aad: Wax-ka-beddel Sharci-darro ah .....	11
Qodobka 28aad: Ruqsad Been-Abuur ah.....	12
Qodobka 29aad: Faafin xog Been ah .....	12
Qodobka 30aad: Magdhaw.....	13



Qodobka 31aad: Faafin Khasab ah .....	13
Qodobka 32aad: Wakaaladda Wararka Qaranka Soomaaliyeed (SONNA) .....	13
Qodobka 33aad: Adeegga Warbaahinta Dowladda .....	14
Qodobka 34aad: Khidmadda lagu fiirsado TV-ga (TV license) .....	15
Qodobka 35aad: Suxufi.....	15
Qodobka 36aad: Waajibka Suxufiga iyo Hay'addaha Saxaafadda .....	16
Qodobka 37aad: Xuquuqda Suxufiga .....	17
Qodobka 38aad: Ilaalinta Xaqa Lahaanshaha (Copy right).....	17
Qodobka 39aad: Dhawrista Xeerkan.....	18
Qodobka 40aad: Kaalinta Wasiirka ee hergalinta xeerkan.....	18
Qodobka 41aad: Baabi'in.....	19
Qodobka 42aad: Dhaqan-gal.....	19